

Tge di la regenza tar la critica da Wieland?

Ina intervenziun en il cussegl grond

■ (anr/vi) Ha il directur da Hamilton raschun cun sia critica ch'ils scolars rumantschs na sappian betg bain avunda tudestg? Vincent Augustin (pcd/Cuira) pretenda respostas da la regenza. Ier ha il president da la Lia Rumantscha inoltrà sia intervenziun en il cussegl grond. Ella pertutga la discussiun publica da las ultimas emnas, suenter che *Andreas Wieland* da Hamilton aveva crititgà las cumpetenzas da linguatg da Rumantschs e Talians. Ord questa critica hai dà ina cuntroversa generala davart l'instrucziun da linguas estras. Cun sia intervenziun involvescha Augustin uss la regenza en il disput.

«È Wieland en il dretg lieu?»

«Èn las conclusiuns dad *Andreas Wieland* gistas, ch'ils Rumantschs ed ils Talians na sappian betg bain avunda la lingua tudestga?», dumonda Augustin e vul anc savair pli precis co che la regenza giuditgescha las cumpetenzas da lingua dals scolars talians e rumantschs a la fin da la scola secundara e reala. «Aves la regenza da giuditgar la situaziun a medema moda sco *Andreas Wieland*, tge ha ella en senn d'interprender encunter, cura e cun tge instruments?»

En cas che la regenza vegn a la conclusiun che *Wieland* n'ha betg raschun, cuntinua Augustin cun suandanta dumonda: «Co giuditgescha la regenza las decleraziuns fatgas publicamain da *Wieland*, ch'è era president da Grischun Vancanzas? Co giuditgescha la regenza cuntunt la remartga che l'Italia n'haja per l'economia d'export nagina muntada pli? È *Wieland* en gliez cas ord vista da la regenza sco president da Grischun Vancanzas anc sin il dretg post?»

Englais a las scolas autas?

Ils scolars grischuns cumenzan en la terza classa cun l'emprima lingua estra chantu-



Vincent Augustin metta sut squitsch la regenza.

FOTO N. SIMMEN

nala ed en la tschintgavla classa cun englais. Quest concept da linguas han ins introduci pir l'entschatta da quest onn en la scola populara grischuna. Augustin vul savair sch'ins sto gia puspè midar il nov concept e co che la regenza giuditgeschia la chausa ord vista da las scolas professiunalas commercialas.

L'englais sco lingua d'instrucziun daventia la norma a la Scola politecnica federala a Turitg. Ma er a las universitads chantunalas sa sviluppijan talas tendenzas. Perquai finescha Augustin: «Co vesi or en quest connex en il Grischun a la Scol'auta teologica ed a la Scola auta da tecnica ed economia?»